

欽定剿平三省邪匪方略

欽定剿平三省邪匪方略正編卷十六

丙辰年

八月十八日

庚寅

明亮奏言鍾祥賊匪於本月初

八日率其醜類分爲六隊蜂擁而來內有騎馬

賊五六十人往來指揮攻撲各營另有一隊約

七八百人兜擾西北山岡意欲焚搶糧臺當飭

總兵德光楊秀副將九十百祥觀祥遊擊常格

馬斌等帶兵分路迎剿鎗箭齊發兼用大礮轟

擊傷斃甚多乃賊衆罔知畏懼愈肆鴟張經

臣

督率侍衛伊里布等領兵從西北山岡下壓侍

衛丑保巴彥泰等領兵從東北山岡下壓各營

官兵見

臣

等首先衝擊一鼓而進斃賊共有四

百餘名將各路賊人先後擊敗詎兇擾西北山

岡一隊之賊竟欲越過山岡直撲糧臺經叅將

羅廷弼率兵堵禦首先迎敵射死七人衆兵鎗

斃四五十人賊注意焚搶官糧冒死抗拒羅廷  
弼獨馬衝擊又連射數人箭已射盡賊衆攢擁  
而來致身被矛傷四處墜於馬下經親隨官兵  
奮勇救出奈受傷深重旋即殞命我兵憤恨已  
極爭先短接與賊人攪在一處刀矛並用又傷

斃百餘人賊始倉惶奔竄查此次賊匪分路攻  
撲較前二次人數倍加經臣帶兵痛剿賊膽漸

落但賊衆連營十餘里若僅從一路進攻轉恐不能得手現俟永保會兵圍剿斷不敢稍事觀望以致遲延再查前次拿獲之張家瑞劉開坤二名臣親自研訊據供劉之協並未見其人姚之富現在營中賊匪大半籍隸襄陽等處欲向東竄恐山道崎嶇不熟路徑難以行走皆思西竄襄河今見土門衝添設三營扼其要路是以

屢次捨命前來攻擾現在賊營男婦約有萬餘人等語訊明後當將該二犯分別凌遲梟示訖奏入

上命軍機大臣傳諭永保明亮曰鍾祥賊匪見官兵在土門衝分設營卡復敢率衆前來攻撲並希圖搶掠糧臺可惡已極經明亮督率鎮將等帶兵迎剿殲斃多賊已降旨交部議敘矣至賊匪由西北

山岡直撲糧臺叅將羅廷弼首先迎擊殺賊多名  
傷重捐軀殊堪憫惻羅廷弼著咨部照副將例議  
卹仍賞給銀三百兩料理喪事伊子侯服滿後之  
部引見以示軫卹至此次明亮等所進圖內土門  
衝一帶現有官兵分設營卡在彼堵剿但據稱賊  
匪思向襄河一帶逃竄而圖內沿河之薛家集龔  
家集二神廟等處並未派兵堵截寧不慮賊匪乘

間由此路竄逸乎且鍾祥正南地方雖分派將備  
安營防堵其正北東北西北一帶核之永保等前  
進圖內如張家集馬家集等處亦俱分兵堵剿而  
東南地勢遼濶現仍無兵防守倘賊匪因官兵追  
捕緊急不能由襄河一帶奔逃竟思鋌而走險復  
向東南竄逸豈不又致蔓延現據明亮奏鍾祥賊  
匪大半籍隸襄陽且查六月以前該處並無賊匪

可見鍾祥之賊卽係永保等在襄陽棗陽等處搜捕未盡之賊逃至鍾祥糾結屯聚豈永保等將賊匪驅至鍾祥遂謂無事竟置之不顧耶永保係特旨令伊總統軍務一切調度機宜皆其專責豈可心存畛域徒思自占地步現在明亮於土門衝節次打仗及奏報各情形永保置若罔聞竟似與伊無涉殊不可解設明亮並未打仗殺賊妄奏邀功

永保卽當據實叅奏。今明亮旣因賊匪撲營督兵  
痛剿。則永保等卽當乘勢進攻。兩面合擊。使賊匪  
前後不能兼顧。庶可一鼓殲擒。乃坐擁多兵。毫不  
相顧。其意以爲正北東北西北一帶。有恒瑞慶成  
鄂輝德齡烏什哈達等分投堵截。無虞賊匪向永  
保等一路竄逸。遂可塞責。其南路竟委之明亮一  
人。全不顧剿賊大局。試思有如此總統軍務者乎。

且閱圖內明亮等在西南一帶紮營永保等在東北一帶紮營賊匪在中間屯聚正當爲兩路夾攻之計乃明亮帶兵剿賊而永保則駐守多時並未聞領兵打仗又不能通盤籌畫將襄陽之薛家集等處及東南一帶派兵堵截所司何事殊負委任永保著再嚴行申飭恒端慶成鄂輝俱著再行申飭現將明亮所進圖內無兵防堵處所俱用硃筆

標識並粘籤發交閱看著永保等按照圖內標出  
各處添派兵將密爲布置並將南路官兵均勻分  
撥再於北路酌分一二領兵大員前往明亮處幫  
同剿捕務將賊衆悉數殲除擒拏賊首毋得再有  
遲緩

上諭內閣曰明亮剿捕鍾祥賊匪督率將弁殲賊四  
百餘名實屬奮勇可嘉著交部議敘其帶兵打仗

出力各員並著明亮查明咨部分別議敘以示獎勵

十九日辛卯永保恒瑞慶成鄂輝舒亮奏言查鍾

祥北界地方遼濶山路叢雜雖緊要隘口俱撥

官兵堵截但恐賊首一經圍攻窮蹙勢必由山

僻小路潛逃臣永保知會臣恒瑞并總兵德齡

自東北正北兩路移營前進俾聲勢連絡賊人

不能乘隙潛逃適臣舒亮已自荊州趕到臣等

公同商酌北路官兵惟總兵德齡在彼正少一

熟諳軍旅之人臣舒亮卽前往德齡一路帶領

進剿臣永保等連日差派將備於各山搜查前

後拿獲匪犯三十四名訊非緊要之賊取供後

當卽正法又接明亮由南路札知現已帶領官

兵在九龍觀土門衝駐扎與總兵楊秀觀祥連

絡紫營亦有賊匪撲犯現查西南九里岡賊匪  
移歸東南之長壽店東北之蓮花堰一帶屯聚

所有北路各要隘臣等逐一安設停妥酌擬臣

恒瑞舒亮自長壽店一帶分路前進臣永保慶

成鄂輝自蓮花堰等路進剿並與明亮札商同

日自土門衝向東北進攻俾賊衆首尾不能相

顧務期一鼓殲除

同日成德惠齡文圖富志那奏言查灌灣腦賊

匪<sub>臣</sub>等連日統率將兵四面進攻賊人自知官

兵驍勇不敢出巢迎拒惟於半山叢薄中多設

地雷伏弩望見我兵敢勇登山卽於牆內發機

擊射要口懸絕之處堆放桶木巨石牆濠之內

遍伏匪徒手執火彈石塊如飛拋擲<sub>臣</sub>等晝夜

籌畫必須誘賊下山生擒首逆則巢穴不攻自

破查前獲匪犯供內皆言張正謨等日盼榔坪  
賊匪前來救援又知縣楊于果拏獲自賊巢潛  
出匪犯張多璜供係張正謨遣往榔坪求救之  
人臣等因思張正謨不知張多璜被獲若計日  
而待必以爲榔坪賊匪來救八月初間可到隨  
於初九日令千總張瑗縣丞蔣振萬帶領兵勇  
多執白布旗號假扮榔坪賊匪從必應經由之

聶家河熊渡一帶乘夜虛放鎗礮由遠而近又

令王母洞一帶營卡兵丁三五成羣紛紛馳向

聶家河熊渡而去故作驚慌接應之勢

臣成德

帶兵伏於獅眠坳山側

臣

文圖帶兵伏於王母

洞山側

臣

富志那帶兵伏於王母洞獅眠坳山

外總路口

臣

惠齡率領文武員弁伏於綿羊腦

山下截其歸路又派侍衛關騰等率領兵勇分

伏賊巢山後溝內初十日酉刻果有二賊匪手

執白旗率領羣賊八百餘人飛奔王母洞獅眠

坳山溝我兵虛作迎剿隨退回卡臣成德臣文

圖伏兵不動任其衝過賊匪見無兵阻遂踴躍

而去將上山梁臣富志那迎頭截剿臣成德臣

惠齡臣文圖三路夾攻截其歸路賊匪無路可

逃捨命抗拒我兵痛加剿殺未令一名漏網生

擒賊目彭佳兆等四十一名當賊匪出巢之後  
關騰等由山後兩路進攻賊巢賊匪望見我兵  
上攻自知前出之賊俱已中計料不能救仍前  
布滿牆頭悉力抗拒及三路官兵剿盡賊匪時  
已交亥未便冒險進攻暫令收兵回營提訊彭  
佳兆等犯據供本日三更時分卽聞鎗礮之聲  
約在聶家河熊渡一帶張正謨疑是柳坪人來

救應卽欲領人前去接應被劉洪鐸阻住勸其  
探明真假及至今早鎗礮之聲愈近隨上高峰  
遙望隱隱見有白旗又見王母洞營內官兵紛  
紛前往熊渡一帶張正謨正欲親往接應又被  
劉洪鐸攔阻待至酉時纔令我等領人下山接  
應被擒等語當將該犯等一併凌遲斬梟其陣  
亡受傷兵勇查明咨部卹賞均奏入

上命軍機大臣傳諭永保惠齡明亮日前據明亮奏  
將南北兩路官兵必須均分停妥各情形札商永  
保永保自當速派兵將前往幫剿並將如何布置  
之處卽行馳奏乃待之已久始見此奏殊屬遲緩  
且據奏稱恒瑞舒亮自長壽店一路前進永保慶  
成鄂輝自蓮花堰一路前進而於明亮一路如何  
添派官兵前往堵截之處並無一語奏及設明亮

處兵力本足敷剿捕捏稱兵少永保卽行據實奏  
奏若接到明亮扎會旣知該處東南一帶地面空  
濶現兵不滿四千不敷防堵卽應分派官兵前往  
四路分布以防賊匪乘間竄逸乃本日奏到之摺  
仍未籌畫及此竟似明亮一路與伊無涉且詳閱  
明亮所進圖內恒瑞本在張家集防堵今移至長  
壽店地方則正東張家集一帶更無人堵截豈不

慮賊匪由此奔竄况閱圖內長壽店距賊巢僅止  
八里何不早由此一路進剿而烏什哈達在流水  
溝紮營舒亮德齡在馬家集紮營自應同時並進  
何以摺內俱未提及永保如此漫無調度又復心  
分畛域殊負委任永保等著再傳旨嚴行申飭至  
灌灣腦賊匪被官兵連次剿殺又遣人潛往榔坪  
求救被獲經惠齡訊出情節派令兵勇扮作榔坪

賊匪誘賊出巢張正謨兩次欲親來接應俱被劉  
洪鐸勸阻實屬可惡惠齡等派兵預爲埋伏將賊  
匪誘過山梁截其歸路賊匪勢益窮蹙無難剋期  
殄滅但前據惠齡節次奏稱賊匪米糧將盡火藥  
已將次用完各處接應之路俱已斷絕是賊匪困  
守巢穴早當束手待斃何以至今尚未殲除淨盡  
且稱賊匪於半山叢薄之中多設地雷並有火彈

等項等語賊匪火藥如果用完何以尚有地雷火彈可見惠齡等前奏不實卽著明白回奏

二十五日丁酉畢沅奏言查荆門縣卽在鍾祥縣

西岸中隔襄江雖有險可阻但鍾祥縣所屬西岸之利河口以上五十餘里至轉斗灣再二十里至島口節節俱有賊匪在對江東岸屯聚相隔荆門僅止一江是西岸一帶甚關緊要現在

已有盤獲偷渡奸細亟須嚴密防截除轉斗灣  
地方先經永保派令翼長富廉帶兵堵禦外其  
餘各要隘

臣

復逐處勸諭紳士人等厚集精壯

鄉勇多則一二千名少亦數百名分投把守並  
優加獎賞鼓勵人人奮勇俱各整齊周密所有  
往來船隻俱令停泊西岸派委知州張琴知縣  
楊際清巡檢費泳等晝夜常川巡查層層密佈

使窮竄餘匪不敢窺伺奏入報

聞

二十六日

戊戌

福寧觀成奏言來鳳賊首胡正中

田谷敦等均經

臣

節次擒獲正法尚有楊子敖

楊子林亦係習教傳徒糾約起事緊要賊目現  
無實在下落若不確訪擒誅遺留餘孽必致故  
智復萌當將生擒各犯嚴行審訊據供楊子敖

楊子林因官兵攻打旗鼓寨甚緊帶同夥匪先  
逃到龍馬山後又到三堡嶺昨被官兵剿殺我  
等被擒伊二人不知下落等語是楊子敖楊子  
林或竟已竄出亦未可定臣等當卽帶兵跟蹤  
前往督率剿捕該匪率領逸出餘黨屯聚指甲  
坡山梁已經諸神保圍住但查看相距處所重  
山疊嶺樹林茂密路徑甚多必須四圍合擊方

可得手隨即分派布置於八月十一日丑刻

臣

福寧

臣

觀成率同諸神保等帶領屯土兵勇分

爲四路同時並進

臣

等鼓勵兵勇一擁而登刀

矛並舉逆匪惶急無措不能抵禦我兵人人奮

勇痛加砍殺殲戮跌斃者不可勝計賊首楊子

敖楊子林譚玉逢捨命奔逃把總虎正林兵丁

謝福榮彭光鰲不避危險奮力追趕虎正林將

楊子敖砍傷擒獲謝福榮彭光鰲將楊子林譚  
玉逢擒獲又擒得打造刀子頭目瞿文清及餘  
匪五百餘名臣等親提研審據供起事爲逆及  
迭次潰逃屯聚情形厯厯如繪當將該逆等分  
別正法此次打仗有土都司溫布搶上山梁殺  
賊受傷陣亡又土叅將色哩瓦土把總江錯太  
受有鎗石傷均不甚重其餘兵勇間有傷亡查

著查明咨部卹賞至四川土兵情願隨往宣恩長陽等處剿賊感恩圖報出於至誠更屬可嘉所有此次隨往剿賊之土兵等著賞給一月鹽菜口糧其土弁著賞給兩月鹽菜口糧用示鼓勵再來鳳縣訓導甘杜前於賊匪滋擾時殉難身死並著咨部議卹

二十七日

巳亥

成德惠齡文圖富志那奏言

臣等

自派兵勇扮作榔坪之人誘賊出巢痛加剿殺

賊雖窮蹙仍前抗拒臣等連日分遣將弁兵勇

或東或西旋攻旋退我兵輪番更替賊匪處處

須防如此五晝夜料賊匪疲憊已極因於十七

日密傳各營分路預備進剿一面選派趨健兵

勇五百人各持乾草一束並噴筒火彈引火之

物暗藏火繩埋伏賊巢四圍溝內三更後攀援

而上於賊牆外土鬆處縱放草束旋即退至半山將噴筒火彈點燃一齊拋擲時值西風正緊

烟焰飛空引透地雷藥線響振山谷延及城卡

鹿角荆棘全行燒燬臣成德督率協領岱明等

由正北進剿臣文圖督率候補叅將朱士奉等

由西南進剿臣富志那督率副將張持等由正

西進剿臣惠齡督率叅將程鵬翼等由正東進

剿復派侍衛關騰道員先福等往來接應我兵  
當地雷一發卽冒烟突火奮勇爭先直前攻撲

逆匪捨命抵禦我兵鎗箭齊發殺斃無數賊仍

抵死抗拒

臣

惠齡密令西南兩路兵勇暫撤山

腰使賊匪全數著力東北並令關騰先福速赴  
笏箕壩山溝加該卡賊匪一出卽行分投攻奪

臣成德

臣

惠齡率兵直撲賊壙果見賊匪由西

南兩路潛來接應

臣

惠齡飛行繞至筲箕壩賊

卡見賊已往東北救援卽督令關騰先福兩路

進攻殺賊約八九百人當將筲箕壩賊卡奪獲

其時

臣

成德等已攻破頭道賊牆四面蜂擁而

入賊匪退入二道牆內我兵卽將賊屍填平濠

溝殺至二道牆外燒燬草棚乘勢進攻

臣

等恐

首逆等見圍拏緊急畏罪自戕不足以快人心

而彰

國憲當於帶領鄉勇之紳士內查有生員孟宇寧候  
補守禦所千總周代暄向曾認識該二犯因令  
緊隨臣惠齡以便指拏仍連夜四路進攻臣惠

齡督率將弁兵勇由笱箕壩一路直逼二道賊  
牆各路鎗礮喊殺之聲山鳴谷應賊匪不能支  
持紛紛潰亂當見百餘賊匪在牆內哀號跪求

乞命孟字寧稟稱所跪賊內隱有張正謨劉洪  
鐸二人臣卽飭候補都司劉貴朝及周代暄酌  
帶兵勇拆毀賊牆而入經孟字寧等指認張正  
謨劉洪鐸等十數人劉貴朝一併押令前來隨  
令緝送大營小心看守並將二道牆垣一齊攻  
破賊巢房屋盡行燒燬約計此次燒死及當場  
殺斃並跳入水塘淹斃者約有萬餘賊生擒頭

目僧廣寧聶傑人之子聶渭聶泮及劉芳李家  
相等四十八名餘黨男婦大小二千七百四十  
九名口奪獲及搜出大礮二尊並鳥鎗長矛腰  
刀無算米麥雜糧數百石所有生擒賊目及被  
擄入夥甘心從逆屢次抗拒官兵者俱難寬縱  
卽梟子駢誅首逆張正謨劉洪鐸二犯委員解  
京聽候查辦各將弁內僅止鄉勇頭人行營把

總銜何紹貴受傷陣亡其餘受傷兵勇另行查明咨部惟查灌灣腦一帶道路分歧山徑遂密乘間逸出之犯現在分遣弁兵四出搜捕隨獲

隨辦以期盡絕根株再

臣

惠齡前聞長陽宜都

連界之涼山地方聚有匪徒數百人形跡可疑時因進剿灌灣腦賊巢不克親往查辦隨派委員弁帶領兵勇前赴該處察看去後茲據稟稱

查有匪徒四五百人屯聚涼山之頂竟有鎗銃  
刀矛器械經官兵圍住等語臣現馳往該處相

機辦理諒此烏合之衆人數無多不難卽時撲

滅又據宜昌府稟稱榔坪賊匪於八月十二三

日分遣黨與滋擾歸州巴東長陽一帶前准永

保咨稱奏撥江西兵一千名前來枝江協剿現

在此項兵丁尚未到來而此處業已竣事臣飛

催江西領兵官弁速赴歸州巴東一帶堵剿並  
囑成德文圖先帶官兵二千名馳赴長陽一帶  
迎擊臣趕將涼山賊匪剿淨速即移師前往合  
剿奏入

上命軍機大臣傳諭永保惠齡福寧明亮曰惠齡等  
掃蕩灌灣腦賊巢生擒首逆張正謨劉洪鐸等所  
辦實屬可嘉除另降旨分別加恩外惠齡著賞給

鑲嵌寶石扣帶成德賞給嵌松石金盒並各賞大  
小荷包文圖著賞嵌松石帶版富志那著賞嵌珊  
瑚扣帶並各賞大小荷包關騰先福著各賞玉搬  
指大小荷包以示獎勵所有隨同打仗各員查明  
咨部議敘打仗陣亡之行營把總何紹貴著咨部  
加等優卹其餘兵勇受傷陣亡者俱查明咨部分  
別賞卹張正謨劉洪鐸俱係緊要賊首自應解京

盡法處治惠齡現因涼山地方有匪徒數百人聚  
集親赴該處拏獲一俟涼山賊匪剿竣卽移師前  
赴榔坪並囑成德文圖先帶官兵二千馳赴長陽  
一帶迎擊榔坪賊匪所辦俱好惠齡惟當乘此勝  
勢速將涼山地方肅清移師榔坪協力攻剿爲要  
上諭內閣曰惠齡等奏掃蕩賊巢生擒首逆張正謨  
劉洪鐸並賊目僧廣寧等四十八名餘黨男婦大

小二千七百餘名灌灣腦賊巢悉數蕩平惠齡著  
加太子少保銜松筠現在出差其工部尚書員缺  
卽著惠齡署理關騰遇有總兵缺出卽行補用先  
福遇有按察使缺出卽行陞補惠齡關騰先福並  
卽先換頂戴其單開打仗出力文武員弁參將朱  
士俸賞給副將職銜候補守備朱槐賞給捷勇巴  
圖魯名號候補都司劉貴朝前鋒校倭什琿俱著

賞戴花翎通判高舉防禦珠隆阿守備利振紀驍  
騎校勝雲千總張琰胡報國外委袁爾棟蕭聯貴  
戴興朝俱著賞戴藍翎遊擊張會元把總楊得陞  
姚文富署知縣楊于果司獄孫士清楊岳典史趙  
珍陳銳俱以應陞之缺卽用候補知縣李維清庾  
泰鈞曾翕受鍾應焄徐鳳翔試用按察使照磨吳  
榮各以應補班次按名先用其帶領鄉勇隨同出

力之紳士候選千總周代暄著以衛守備補用武  
生常光華以把總補用並俱賞戴藍翎生員孟宇  
寧著以教諭卽用候選教諭何其昌捐職布政使  
經歷楊仲從九品周昌秀府經歷吳兆蘭八品頂  
戴朱奎杜思寬俱著交部酌量選用生員向大仁  
劉文璵俱著以八九品佐雜酌量補用以示朕懋  
賞旌功恩施格外至意

二十八日庚子永保恒瑞慶成鄂輝奏言查鍾祥

縣境內賊匪屯聚處所南有直河橫阻西臨大

江是以逆賊數月盤踞未能窺伺郡城屢經拏

獲賊匪詢出鍾祥地方匪徒多有襄陽棗陽宜

城交界之人因東南京山一帶路徑生疎仍欲

乘間北竄等語臣等公同商酌鍾祥北界地勢

遼濶山路叢雜在在有路可通必須分派官兵

先於各緊要隘口堵截方可痛剿

臣

等分兵三

路進攻又於各小路安置營卡防堵惟是彼時

道路間隔賊匪屯聚南路情形未能深悉聞明

亮帶兵將抵鍾祥當卽札知就近察看應於何

路堵截何路進兵之處覆信到

臣

以便併力圍

攻誠恐事隔旬日上厯

聖衷卽冒昧將分派鍾祥北面三路官兵情形先行

具奏仍與明亮來往札商南路應行布置要路  
嗣賊匪未向東奔全夥俱移向西北紅山寺高  
廟一帶山梁屯聚臣等與明亮商酌各路營盤  
俱已漸次移前與前圖貼說情形迥異謹將四  
路官員兵數及各要隘堵截官兵名單一併恭  
呈

御覽

同日明亮奏言查此間賊匪自初八日敗回以後不復再出滋擾至十一日將九里岡沈家集一帶賊營移向焦山之前歸併屯聚自十二日晚至十六日天雨連綿未能前進

臣

同德光於

十八日率領侍衛官兵蹕看進兵道路及至賊營處所正值賊人自焦山向西北一路搬移

臣

卽率侍衛壯保墨新等尾追趕殺殲斃多人追

至紅山寺地方賊匪俱已紮住匡家衝臣所帶

官兵無多又值天雨遂卽撤回親提所獲各犯

逐加研訊僉供初意原欲東去因道路不諳又

無接應賊人等大半籍隸襄陽宜城欲圖西竄

故兩次皆向西北一路挪移等語現在賊營離

土門衝稍遠臣連日詳看地勢相定五朶寺一

帶可以拏營緊逼賊巢惟土門衝最爲緊要因

酌留官兵駐紮并添派鄉勇協助以資守禦

臣

遂于二十一日率同官兵前至五朶寺設立三

營

臣

知賊人見逼近拏營必來攻撲一面派令

千把等員率同兵丁人夫趕築溝壘一面於拏

營前二里許宋家衝一帶山岡派德光楊秀觀

祥百祥九十等各帶官兵分段防禦賊人果於

未刻蜂擁而來因見德光等所佔山岡官兵排

列嚴密未敢衝撲乃恃其人數衆多分道從左

右兩路前進臣親率巴圖魯侍衛官兵突出迎

擊鎗箭傷斃數十人乘勢追殺又經德光等領

兵從山岡夾擊衆賊倉惶敗走自山坳竄入水

田官兵盡力追趕偏仄泥淤行走不能十分便

捷未能痛加剿殺時天色已晚因將官兵挨次

撤回查賊匪既聚處一山臣等亦移營進逼合

兵圍剿較易得手總期會合攻擊一鼓殲除均  
奏入

上命軍機大臣傳諭永保明亮曰鍾祥賊匪本欲由  
東南京山一帶逃竄因該處路徑生疎仍思乘間  
北竄將賊營移至焦山西北一帶屯聚經明亮察  
看形勢移營緊逼賊巢賊匪分路前來衝撲復被  
官兵擊斃多賊而永保等在鍾祥多時尙未帶兵

進剿大不如明亮之屢次殺賊殊屬遲慢永保等  
著再傳旨申飭至閱圖內粘籤處所布置尙未嚴  
密賊匪旣在紅山寺高廟等處山梁屯聚自係欲  
向北路竄逸而永保等派兵堵剿之處形勢尙覺  
散漫特于圖內再用硃筆標出永保等應遵照標  
識處從西北一帶四面圍緊明亮從南路帶兵逼  
壓永保等從北路緊逼兜剿庶賊匪無路逃竄可

期一鼓殲除早靖地方毋得再有遲緩

上諭內閣曰前因明亮將孝感縣屬賊匪全數剿淨  
曾降旨加恩賞給輕車都尉世職畢沅前次剿洗  
當陽賊匪擒渠俘逆肅清縣治今惠齡又將灌灣  
腦賊巢全行掃蕩生擒首逆張正謨等解京均屬  
可嘉雖湖北教匪滋事該督撫等平時失于覺察  
固有應得之咎而此時伊二人著有勞績不可不

加之懋賞畢沅惠齡著一體賞給輕車都尉世職  
用昭優獎舒亮前在當陽剿除賊匪業經賞給副  
都統職銜現出有鑲藍旗漢軍副都統一缺卽著  
舒亮補授楊秀于明亮未到之先在鍾祥防堵賊  
匪尙能嚴密該鎮從前已得花翎著加恩賞給提  
督銜以示鼓勵

欽定剿平三省邪匪方略正編卷十七

丙辰年

九月初五日

丁未

永保恒瑞明亮慶成鄂輝舒亮

等奏言

臣

等日前分布官兵圍剿鍾祥賊匪因

陰雨連綿未得尅期進剿二十三日天氣稍晴

臣

永保分路差弁札知均於二十四日寅刻同

時發兵並進隨密令官兵於各路設伏一面催

趙大隊協力進剿見賊匪漫山遍野不下五六

萬人施放鎗礮捨死衝突直撲臣鄂輝等大隊

臣鄂輝等卽親率官兵奮勇擊打臣永保慶成

等橫衝撲入正值臣明亮等帶領兵弁自南而

來攔住截殺臣恒瑞等督同滿漢官兵自東山

而至臣舒亮等又從北山梁一路而來鎗礮齊

施併力下壓賊衆四面受敵首尾不能兼顧潰

亂驚惶自相踐踏臣等當卽乘勢四路殺入自

辰至酉殲斃賊匪不可勝計時已昏暮不便深

入<sub>臣</sub>等隨一面飭令糧員張瑤張璿等運送乾

糧以資兵食一面布置官兵嚴密圍守以待天

明再行痛剿不意夜半又雨至二十五日黎明

未止鎗礮不利施放賊匪見官兵晝夜圍攻卽

趁大雨越嶺扒山紛紛亂竄<sub>臣</sub>等督兵冒雨分

路截殺短刃相接又斃賊數千人生擒一千餘

名其遺棄婦女幼孩及自盡者以萬計至首逆

姚之富劉起榮張富國等是否已被殲斃抑或

尚在奔竄一時未能查明

臣

等當卽商議分爲

四路各帶將備兵弁一面分路隨後追剿一面

查看地勢繞道兜擒

臣

永保同成德凝德等酌

帶弁兵鄉勇於附近山溝樹箐有可藏匿之處

分投搜捕連日裹糧追趕必期悉數撲滅以盡

根株所有生擒各犯訊係無關緊要者均卽隨  
時正法內有曾立大旗稱頭目者二人俟訊明  
後分別辦理其遺棄婦女幼孩現在派人詳查  
如有逆匪眷屬子孫當分別緣坐如係裹脅良  
民令其各歸本業計連日所獲賊人鎗礮刀矛  
八千五百餘件飭令銷燬外其牛隻騾驢衣物  
等項均已分賞出力兵勇以昭鼓勵再查襄陽

呂堰驛巡檢王翼孫前聞被賊戕害臣等因無

確據未敢冒昧具奏茲拏獲賊目俞宗武搜出

呂堰巡檢印信一顆訊悉賊匪焚搶呂堰驛時

王翼孫罵賊不屈遇害屬實可否

准予議卹之處出自

天恩

同日惠齡奏言前聞宜都長陽交界涼山地方

現有賊匪屯聚，臣於剿平灌灣腦賊匪之後，卽親自帶兵馳往察看該處山勢極險，惟觀音閣轉木巖爲上山路徑，餘皆石壁陡削。山後雖有小路陡直，不可行。詢之自山逃下之人，據稱山上向有居民七八十戶。八月初旬陸續來有二百人，攜帶家口，聲稱被榔坪賊匪擾害逃來。山上初十後忽來三四百人，嗣又來一二百人。

亦俱稱自榔坪逃難到此至十二三日聞官兵  
攻剿灌灣腦之賊甚急伊等卽稱係榔坪賊匪  
遣來欲往灌灣腦救應當迫脅山上居民入夥  
居民畏其兇橫紛紛逃走等語

臣

查前次灌灣

腦獲到夥匪均稱張止謨曰望榔坪同夥來救  
今林之華等膽敢遣共黨類扮作難民潛至涼  
山欲圖援應實屬狡一著自當乘此兵威勝勢分

從山前山後鼓行而上惟該處道路一線羊腸  
祇容一入進步我兵魚貫而入慮賊匪從上視  
下以逸待勞莫如留出山後一路於要口伏兵  
堵剿官兵直從前路進攻賊人自必羣趨而下  
不難悉數殲擒因令侍衛關騰等帶領兵勇埋  
伏山後臣督率道員先福副將張持等帶領兵  
勇於二十五日卯刻從山前分路攻進是日大

霧迷漫兵勇等潛蹤躡足冒霧前行直至觀音  
閣轉木巖有賊匪數百人見我兵已到鎗石亂  
發我兵各用擋牌遮護開放排鎗擊死賊匪六  
七十人賊匪拚命抗拒我兵直前攻撲不料賊  
匪已挖斷巖前進路在對面山梁施放鎗礮密  
如雨至我兵隨用大礮轟擊又擊斃數十人是  
時天降大雨山路溼滑難以冒險仰攻因卽就

所占二處紮營斷賊下山之路賊匪見我兵屯  
住不退遂於是夜四更率領二百餘人從山後  
逃下涇關騰鄭成基施放號礮伏兵齊起左右  
圍剿殺死賊匪一百多人餘賊卽乘夜復逃上  
山我兵從後追趕賊匪墜巖身死者不少因山  
徑過窄大雨不止未便窮追亦乘勢於山後走  
路漕王家路口等處紮住一俟雨勢稍停卽當

鼓勵各兵奮勇直上悉力殲除再頃據長陽等  
州縣稟報榔坪賊匪林之華等現在傾巢而出  
分爲兩路一由大峰壩等處前來滋擾長陽現  
在滋邱屯住係林之華爲首一由高陽寨等處  
前往歸巴一帶滋擾係覃加耀爲首等語臣查  
長陽一路已有成德文圖帶領滿漢官兵及先  
派往之安徽省兵共二千餘名在彼剿捕臣

俟凉山賊匪剿除後亦卽移兵前往其歸巴一

路臣將永保派來之江西兵一千名飭令星馳

赴援此時尙未到來現復委員持令嚴催以期

速至惟彼處兵力尙單恐不足恃聞福寧搜捕

龍馬山賊匪不日卽可完竣臣已飛咨福寧等

一俟搜捕淨盡卽就近帶兵從巴東一帶截殺

庶上下游均有官兵剿捕似不難於撲滅均奏

入

上命軍機大臣傳諭永保惠齡畢沅福寧曰鍾祥賊  
匪糾集夥黨負隅抗拒經永保等督率官兵分路  
進擊四面剿殺殲戮無算寔爲可嘉除降旨加恩  
外永保恒瑞明亮慶成鄂輝舒亮成德著各賞白  
玉搬指大小荷包阿克棟阿楊秀德齡德光富成  
著各賞青玉搬指大小荷包烏什哈達王文雄穆

維江鼎著各賞大小荷包以示獎勵至賊首姚之  
富劉起榮張富國最爲要犯是否已經殲斃抑尙  
乘間逃逸務須跟蹤搜捕毋任竄逸他處其劉之  
協尤爲傳教首犯更當嚴究蹤跡搜查務獲至此  
次所獲賊人鎗礮刀矛等八千五百餘件飭令銷  
燬一節所辦米爲得當此皆軍營需用之器著卽  
就近交安陸府存貯庫內以備抵撥又惠齡馳赴

涼山剿殺賊匪所辦亦屬可嘉惠齡著賞給白玉  
搬指大小荷包現據惠齡奏榔坪賊匪分爲兩路  
前往長陽歸巴滋擾等語其長陽一路已有成德  
文圖帶兵剿捕著成德等奮力進擊毋少遲緩其  
歸巴一路不可無兵堵截福寧在宜恩搜捕賊匪  
本屬無多自己早經剿淨福寧應卽速移師前赴  
歸巴會合夾擊至惠齡現在搜剿涼山餘匪亦應

趕緊辦竣以便移兵前赴長陽併力攻擊接奉此  
旨時如已將餘匪剿淨業經移師前赴榔坪固屬  
甚善倘尚有須在彼搜捕之處卽應酌派鎮將大  
員帶兵數千先行馳赴榔坪助剿更可得力

上諭內閣曰鍾祥賊匪糾聚屯聚經永保等督率官  
兵分路進擊四面攻剿掃除殆盡皆係鄂輝慶成  
阿克棟阿奮勇所致實屬可嘉慶成前已加太子

少保銜著晉加太子太保銜鄂輝亦著加太子少保並賞都統職銜總兵阿克棟阿前已有旨俟有提督缺出卽行陞用茲亦著加太子少保銜以示優獎所有此次打仗兵丁并著加恩賞給一月錢糧惠齡督率官兵在涼山地方痛剿賊匪亦屬可嘉所有該處打仗出力兵丁亦著加恩各賞一月錢糧其罵賊遇害之巡檢王翼孫著咨部卹卹

同日汪新奏言查楚北教匪滋擾調派外省官兵協剿需用馬騾均係隨帶並咨調來楚爲數本甚充餘惟因五六月間天氣炎暑間有勞傷倒斃卽各驛額馬亦因文報絡繹晝夜無休傷斃頗多目下鄖陽襄陽孝感當陽枝江賊匪雖已殲除而大兵圍剿鍾祥賊衆馬匹自所急需因於下游各營存馬內湊調賡壯馬一百匹趕

解應用並復飛咨豫撫臣景安購僱馬騾數百匹頭以濟要需現據咨覆先行辦集健騾一百頭抽調滿漢營馬一百匹委員徑解軍營續後購得再行趕解等情計算已敷馳驟之用目前鍾祥賊匪指日殲除大兵應卽移赴宜昌施南等境該處跬步皆山人夫不能負重轉運糧餉軍裝軍火等項若全資夫力不特險僻之區僱

集不易且逼近賊氛奸良莫辨更慮非宜若從  
遠處僱脩長夫押赴供役須給與安家銀兩方  
能應募則需費實屬浩繁自應以馬騾馱運較  
爲省便復查向年西省馬販每八九月間趕羣  
赴豫東等境購售現委員馳往挑買壯健馬騾  
數百匹頭迅速趕回派赴宜昌施南各糧站地  
方以爲轉運糧餉一切之需而剿匪事竣仍可

撥補各營驛缺額之用再查各軍營官兵春夏  
奉調輕裝迅發未攜寒具茲屆秋高氣凜需用  
棉衣甚急現已飛飭武昌漢陽二府趕緊製辦  
分解散給統俟事竣於各兵名下照例扣還奏  
入報

聞

初八日  
戊戌

上命軍機大臣傳諭永保畢沅汪新曰據御史潘紹  
經奏湖北鄉勇有係州縣招募者有地方紳民供  
給夫費者現在軍務指日完竣除留防緊要各隘  
口外其餘應令解散歸農等語所奏似有所見鄉  
勇賢愚不一賊匪滋事之初檄調官兵一時未集  
未嘗不暫資其力現在剿捕事宜不日告竣自應  
查明裁撤以免藉端滋擾當陽鄉勇業經畢沅飭

令歸業此外惟榔坪鍾祥剿捕未竣或需酌留防堵其餘剿賊淨盡各州縣著傳諭永保畢沅汪新查明裁撤留心妥辦再永保等殲戮鍾祥賊匪乘得勝之兵四面搜拿無難悉數殲除而宣恩涼山賊匪無多更屬易辦福寧惠齡俱當上緊剿辦以便速赴榔坪會合截殺生擒林之華等何以未見奏到移師日期著再傳諭永保福寧惠齡務宜倍

加奮勉將鍾祥等處餘匪剋日掃除星赴長陽巴東一帶會剿勿稍延緩

十一日癸丑永保恒瑞明亮慶成鄂輝舒亮奏言

臣等查鍾祥屯聚賊匪數萬之多前經官兵四面攻擊斃賊無算惟山徑叢雜易於潛逃必須上緊追剿且緊要頭目未獲更須奮力追拏臣

永保一面帶領官兵在各處搜剿臣恒瑞總兵

富成等由香花園南總畝爲一路臣明亮總兵

德光等由吉龍山豹子崖爲一路臣慶成鄂輝

等由板橋店柴溝堦爲一路臣舒亮等由焦山

觀花灘爲一路各帶兵分路追捕於二十七日

夜追至大高山頂擊斃賊匪無數並拏獲活賊

詳加訊問皆稱賊匪會已預商如遇官兵圍截

緊急不能抵禦卽四散奔逃俱由前經擾過地

方分路趨行免被圍截總於雙溝會齊計議等

語臣等恐賊竅入豫省邊界所關非細臣恒

瑞明亮慶成鄂輝舒亮等卽帶領巴圖魯侍衛

及奮勇馬兵在前總兵富成德光楊秀德齡阿

克棟阿帶領步兵大隊隨後進發連夜馳抵雙

溝適賊匪向北逃竄臣等自北而南衝入賊隊

縱橫截殺擊斃賊匪無算雙溝舊磚堡臨河最

高賊人有竄入據守者臣等當卽分派官兵拋

擲火彈施放噴筒隨選派奮勇弁兵援木至堡

牆上縱火焚燒斃賊甚衆復於前後屋院搜獲

賊二三百名立即正法統計連日沿途追剿並

在雙溝截殺生擒之賊約有二千餘人其中有

大小頭目十七名而姚之富劉起榮等首逆尙

未弋獲並有餘匪未淨恐其散而復聚蔓延滋

事查呂堰驛地處衝衢兼與河南接壤而棗陽亦與豫省毗連各該處向多邪匪必須堵截嚴

拏

臣

明亮同總兵德齡等帶領弁兵前往呂堰

驛防堵並派總兵阿克棟阿帶兵前往新店舖

駐扎都司王化龍仍令在棗陽一路防守

臣

等

自二十四日帶領官兵盡力痛剿趕緊追殺七晝夜並未稍停所帶乾糧鉛丸火藥火繩將

次用完必須稍息兵力並趕辦接濟方可再行  
分途剿捕總不使稍留餘孽連日打仗官兵內  
直隸守備蕭永齡河南守備劉天錫受傷陣亡  
其餘弁兵查明另行咨部

同日畢沅奏言現在大兵逐步進剿山路分岐  
賊匪可以竄越而鍾祥之溫峽口乃京山縣入  
境要隘若此處防範稍疏賊匪闖入必致四延

爲害臣當卽親詣彼處督率該府縣召集紳士

鄉勇相度扼要處所指令分拏各卡並面加鼓

勵激勸務須晝夜嚴防咸各踴躍趨事臣復轉

至觀山營盤所有屯聚賊匪業於二十四日經

官兵剿殺過半惟賊首未經就獲仍同餘賊分

竄至襄宜交界黃龍壩一帶現經各路官兵晝

夜追逼隨處搜捕該處相距襄陽僅有數十里

此時河水稍退多有淺窄洲灘恐賊匪潛行涉  
渡冀延殘喘且襄樊地方商民甫經復業人心  
尙懷疑懼亟須彈壓鎮定

臣

卽星夜順道先至

襄陽府屬之宜城縣查看東西河岸所設各卡  
俱尙整齊諄飭兵勇務各勿辭勞苦實力堵拏  
逃匪毋使一名漏越連日據該署縣知州徐昱  
等率同紳勇擒斬敗竄逆匪陳玉王學中等七

十一名而宜城縣以上之小河口尤屬要隘翼  
長富廉已移兵駐劄此處堵禦甚嚴民情安貼

臣隨馳至樊城該處原經安襄鄖道胡齊崙派

有委員紳勇防禦臣復飭令沿河緊要隘口添

集精壯鄉勇督令分投截拏先後擒獲逸匪陳

應浩等二三百名訊俱聽從姚之富等入教肆

逆節次抗拒官兵擄搶良民逼脅入夥當卽分

別凌遲梟首示衆其襄陽府城現在防兵不及  
五百名總兵徐昭德率領防守城廂內外布置  
亦俱得要目下襄樊民心已定安居守業紳勇  
感激奮勉惟襄陽城垣寬濶且存貯軍火糧餉  
實爲最要現在兵力稍單而永保明亮恒瑞慶  
成鄂輝舒亮富成等連日窮追賊匪已至王家  
河一帶緊逼賊營俱在襄郡迤東數十里之內

臣  
惟有盡心督率文武各官及兵役人等倍加  
嚴密巡防仍與各路軍營互相知會悉力截剿  
並飭將軍火糧餉探明路徑源源撥赴各營俾  
大兵得資接濟以期尅日蕆功

同日景安奏言竊湖北鍾祥地方賊匪屯聚經  
永保等集兵圍剿該處路徑叢雜誠恐賊匪紛  
紛四竄臣當將現在防禦兵丁數百名並團練

鄉勇分撥各處嚴密堵截八月二十八九等日  
據差弁探報鍾祥賊匪向北逃竄復分向襄陽  
之雙溝王家樓一帶村庄焚掠並有各處居民  
逃避前來臣料永保等自必帶兵分路追剿當  
卽派撥將脩等酌帶兵勇於東西中三路分投  
堵剿臣於豫楚交界往來策應並曉諭軍民人  
等此等竄敗餘匪卽日搜捕淨盡毋稍驚惶其

逃避前來民人飭令地方官暫時妥爲安頓勿  
使遠徙復飛飭鄧州新野唐縣等處分佈鄉勇  
嚴密防範惟臣處地廣兵單且均係平行地面  
並無險要可據一面知會永保等分兵迅速抄  
道由北兜剿旋據探報恒瑞明亮等均已帶兵  
趕至雙溝舒亮德齡帶兵趕至王家樓呂堰驛  
一帶分路撲剿至南路官兵不分晝夜極力追

剿湖北糧運一時未能趕到軍火等項亦將用

完臣卽將新野存貯之火藥鉛丸火繩趕緊撥

發並米麵等物飛速分運前往以濟要需連日

據臣處派出之都司蘇大雄等先後稟報賊匪

各處奔竄或數百人或數十人到處焚掠該將

備等帶領官兵凡有北竄賊匪立時截拏除被

官兵鄉勇殲戮及落水淹斃外生擒多名臣於

所到之處卽行訊明正法再本年四月初楚匪  
擾及鄧州境內本地教匪滋擾經署鄧州知州  
同知周璣召募鄉勇先將本處教匪痛加殲擒  
楚匪不敢深入近日臣訊據獲犯供詞尙有欲  
往鄧州報仇之語當復密飭嚴防茲據稟稱親  
赴交界之魏家集一帶寔力防禦三十日竟有  
賊匪五六十人逃竄入境隨卽上前擒捕擒獲

徐明玉等二十一名餘皆職斃除飭該署州訊  
明犯供如非緊要頭目卽於該處正法外臣查  
周璣平日居官穩實勤幹於一切守禦事宜甚  
爲周密並能不辭勞瘁可否量加鼓勵出自

天恩均奏入

上命軍機大臣傳諭永保畢沅景安曰永保奏鍾祥  
餘匪向北逃竄分兵追捕據獲犯供稱賊匪等欲

往雙溝會齊恒瑞等已先馳至該處正可迎頭截殺而畢沅現已馳抵襄陽一帶堵截河南邊界又有景安董率堵拏所辦俱爲周密至永保等所帶火藥等項將及用完現據畢沅奏業將軍火糧餉源源撥赴景安亦將新野存貯之火藥鉛丸等項趕緊運往所辦可嘉永保等惟當上緊搜捕務獲姚之富等並查拏餘匪淨盡以副委任所有陣亡

之守脩蕭永齡劉天錫二員著卽咨部加等優卹  
上諭內閣曰河南署鄧州知州周璣召募鄉勇將逃  
竄入境賊匪併力剿殺擒獲多名實屬奮勉著賞  
給知府陞銜俟竣事後送部引見以示獎勵

同日

上命軍機大臣傳諭永保明亮鄂輝姜晟曰據額勒  
登保奏和琳於八月三十日因受瘴疫以致洩痢

病逝此時剿捕苗匪正在喫緊之際不可無人督  
率湖北鍾祥竄逸餘匪有永保恒瑞慶成舒亮富  
成等儘能辦理明亮鄂輝接奉此旨卽就近由驛  
馳赴湖南接辦軍務永保等不可心存疎懈惟當  
倍加奮勉務期生擒姚之富等不但免其治罪並  
當優加恩獎

十二日

甲寅

秦承恩奏言前據舉人王棠職員朱

儀軾必杰等呈請自脩資斧團聚鄉勇防守卡

隘經

臣

批准前往茲據稟稱由四川大寧交界

挨查卡隘於八月十八日查至湖北竹谿縣保

豐地方有竹山縣紳士前來口稱接到房縣邊

卡傳單一紙內有二萬餘人約期八月十四日

先來搜山後攻房城等語該紳士等頗覺張皇

但細思從前鄖陽府屬邪匪久經大兵殲滅已

無噍類何致別有二萬餘人攻擾房縣之事果  
有匪徒復出滋擾豈肯自露風聲令人傳播且  
單內指明八月十四日逾期並無影響足見虛  
妄當令該紳士等散歸村落各自曉諭居民照  
常安業適陝西督糧道孫藩在保康房縣巡查  
途次風聞兼程趕至告知房縣地方極爲寧靜  
前次傳單實係妄言應卽燒燬不許轉傳該紳

等驚疑盡釋俱各歡喜歸業等情旋據孫藩稟  
報各卡隘因聞此信防範益加慎重正於地方  
有益<sub>臣</sub>恐該處接壤歸州巴東或係榔坪匪徒  
因見大兵雲集自知殲滅在即暗布浮言搖惑  
人心亦未可定當卽密札該道及各地地方文武  
員弁督令慎密防堵訪拏妄言之人嚴行跟究  
不得因無實事稍存懈怠致滋事端奏入

上命軍機大臣傳諭福寧畢沅汪新秦承恩曰竹山  
縣紳士人等接到房縣邊卡傳單一紙稱有二萬  
餘人約期八月十四日先來搜山後攻房縣之語  
卽陽邪教久經官兵剿捕無遺何致另有二萬餘  
人竹山房縣與歸州巴東接壤自係榔坪匪徒因  
見大兵雲集殄滅在卽暗中播散以爲搖惑人心  
之計此等妄布浮言匪黨必須拏獲一二名從嚴

究辦庶奸徒知所懲儆著傳諭畢沅汪新卽飭所屬密行購訪務查明此項傳單起自何處係何人所造拏獲辦理該處地方與陝省與安境壤毗連秦承恩亦當一體飭屬留心緝獲勿任轉相傳播以致與情驚疑至柳坪賊匪林之華等現分赴長陽巴東一帶滋擾不可不速行截捕前據福寧奏剿辦捐甲坡等處賊匪等語卽移師宣恩著再傳

諭福寧觀成務須趕緊將宜恩餘匪辦盡星赴巴東一帶與成德文圖會合夾擊勿再遲延干咎

十三日<sup>乙卯</sup>成德文圖奏言查榔坪賊首林之華

分投四出滋擾屯聚滋邱爲巢穴<sup>臣</sup>等於九月

初一日行至長陽縣屬青崗坪教匪有欲渡河之信卽派署宜昌鎮總兵黃瑞帶兵一百名在滋邱河南一帶堵截河北馬連地方係賊人出

路派驍騎校青格帶兵一百名在彼堵截

臣等

細查地勢據拔貢生彭世壻稟稱關口乃柳坪

之要道山高路險自此以下地勢漸低可通賊

穴現在賊匪於關口山梁紮卡二座堵拒官兵

必先得此要卡始可逼追是以

臣

當挑派佐領

瑪克湯阿等帶滿兵五十名於山後石巖中潛

伏一聞喊殺之聲卽攀援上山直撲賊卡又派

滿漢兵一百名接應

臣

成德同協領果勒明阿

寶德等帶領滿兵三百名

臣

文圖同候補叅將

朱士奉等帶領漢兵三百名候補叅將諾音保

等帶安撥兵二百名卽於是夜三更時起程黎

明直至關口

臣

文圖等自北而進叅將諾音保

等自南而入

臣

成德等自東而進分爲三路奮

勇齊上鎗箭併發賊人亦用鎗礮抵擋正在衝

殺又經瑪克湯阿等埋伏之兵及接應兵丁攀  
援繞道齊上山梁跳入卡墻賊匪內亂棄卡逃  
走官兵乘勝追逐殺賊匪二百餘人生擒活賊  
八名搶獲大礮一尊烏鎗矛刀并雜糧騾馬等  
件<sub>臣</sub>等因關口以下山形散漫道路甚多現帶  
之兵不滿二千賊卡甚密不敢深入惟恐後路  
有失隨將兵丁分紮關口山梁一面飛咨惠齡

迅速撥兵前來臣等現在晒探道路相機進攻

奏入

上命軍機大臣傳諭永保福寧曰成德文圖奏剿殺  
榔坪賊匪所辦可嘉但閩摺內稱教匪有欲渡河  
之信而成德等所帶兵丁現在僅有二千之數該  
處山徑叢雜堵剿兇擒兵力恐有不敷現已據成  
德等飛咨惠齡速爲撥兵計此時惠齡自早已添

卷之三 國朝文獻卷之三  
派兵丁撥往協剿但福寧觀成在宣恩建始一路  
距榔坪最爲近便此時福寧等所辦宣恩之賊自  
已搜捕完竣著卽乘兵威勝勢速赴榔坪自南而  
北成德文圖帶兵自北而南兩路夾擊以期一鼓  
集事

十四日  
丙辰惠齡奏言京山賊匪經臣率兵圍剿

殲戮多名因秋雨淋漓山高路滑難以仰攻數

日以來總未開霽

所

恐賊匪乘此突圍逃竄或

於山徑陡削之處滾身而下均當嚴密周防因

復分派兵勇在四圍山脚晝夜截拏並派員弁

刻刻巡捕九月初二日經縣丞蔣振萬行營把

總李向葵於山巖密箐內拏獲王來卿鄧子青

二人稟解前來

臣

面加訊問據稱林之華屢次

遣頭目覃士湖鄧芳張曰先等帶領九百餘人

各攜家眷暗藏火藥鎗刀於包裹行李之內扮作難民分爲三四起陸續來涼山打聽官兵卡座何處好走意欲往引張正謨等逃出到榔坪入賤因探知官兵攻圍甚緊無路可入覃士潮等就在涼山起事使張正謨等知有人接應自必率衆衝出可以同往榔坪不料官兵將涼山圍住占據要路覃士潮等畏懼遣我等趕回榔

坪叫林之華遣人接救現在山上除婦女幼孩  
並逼脅入夥外可以打仗者還有七百多人糧  
食就割山上包穀充食等語臣當將王來卿鄧  
子青先行正法細查涼山形勢賊匪以小涼山  
爲犄角以頭天門獅子山猴查灣老屋場等處  
爲門戶以二天門爲咽喉必須設法將此數處  
奪獲則不難一鼓殲事適於初五日雨勢稍止

臣

遂令侍衛關騰等帶領兵勇豫行埋伏小涼

山賊卡之側俟守卡賊匪往救頭天門等處卽

可乘虛奪占又令道員先福前鋒校倭什琿候

補都司劉貴朝等帶領兵勇奪占山後猴查灣

老屋場二處

臣

親督文武員弁進攻獅子山賊

匪鎗石亂發如雨我兵先用排鎗環擊步步向

前攻近賊卡卽拋擲火彈點燃噴筒燒斃數十

人當見頭天門九鼎堦香爐巖各卡賊匪紛紛  
前來救援

臣

卽飭令同知鄭成基候補守備朱

槐候補千總胡報國等飛赴頭天門乘虛急攻

朱成基率同朱槐身先士卒跳入賊卡胡報國

帶領官兵一擁而入短兵相接殺死數十人餘

賊潰逃當將頭天門賊卡奪獲賊匪退入香爐

巖卡內時

臣

在獅子山督率兵勇冒險直進行

營把總李向葵復率兵繞至卡後拔開鹿角跳  
過濠溝直入卡內賊匪慌亂臣卽督兵夾攻殺

死一百餘人隨將該卡奪占關鵬等遙見小涼

山賊匪出卡因卽帶兵直上卡內尙有餘賊把

守而出卡之賊復轉身來救關鵬隨督勵兵勇

直前迎擊殺死數十人餘匪不能抵禦棄卡而

逃亦將該卡奪獲其猴查灣老屋場二處已經

先福等帶領兵勇奪佔賊匪俱皆逃入九鼎壩  
香爐巖二天門卡內捨死抵禦時已近夜山徑  
狹窄未便進剿隨將奪獲各卡分兵把守再爲  
進攻現在涼山餘賊無多天氣清明數日內卽  
可剿捕淨盡奏入

上命軍機大臣傳諭永保惠齡成德曰惠齡奏剿殺  
涼山賊匪督率鎮將各員分路進攻將獅子山小

涼山等五處要卡奪獲在事文武員弁均屬奮勉  
可嘉惠齡著賞給白玉四喜大吉牌大小荷包關  
騰先福各賞紅綠玉四喜大吉牌大小荷包鄭成基  
倭什琿劉貴朝朱槐胡報國蔣振萬李向葵俱著  
賞給大小荷包其打仗出力兵丁均著賞給一月  
錢糧以示獎勵至涼山賊匪已屬無多首犯覃士  
潮及其餘賊匪惠齡自巳於日內搜捕淨盡務卽

就近移兵速赴長陽一帶會合成德文圖夾擊以  
期一鼓集事

十五日丁巳福寧觀成奏言查龍馬山賊匪盤踞

高山恃險負隅臣等於剿破旗鼓寨後卽先遣

遊擊董寧川等帶領兵勇前往相機剿捕臣等

趕緊將來鳳境內逸匪搜捕肅清亦卽帶兵進  
發途次接據該遊擊等稟報賊人因乏糧食見

山下稻穀成熟率衆搶割並欲侵犯營卡我兵奮勇向前殺賊甚多首逆李登敖正欲奪路奔逃經兵勇一齊追上砍傷擒獲餘賊奔竄四集旋有頭目宋文錫等遣夥匪數人喊稱賊匪等目知悔過情愿投誠該遊擊等不敢擅便據實飛稟前來

臣

等飭令將擒獲首逆李登敖嚴行

監禁至賊人詭詐不可輕信如果真心悔過求

生卽應將器械家屬先行獻出然後自縛來營  
或可貸其一死但總須加意防範切勿大意等

情批發去後

臣

等恐失事機卽連夜兼程而進

行抵龍馬山剗定營盤隨報稱賊匪攜帶家口

扛擡鎗礮刀子前來呈獻

臣

等卽當盛陳兵威

排列鎗礮該匪等望見官兵卽俱伏地叩頭哀

求乞命情形頗爲真切

臣

等遣人受其器械並

將男婦人等諭以恩威妥爲駕馭安頓嗣又陸續投出多人當令逐一查點內有名大小頭目宋文錫李登祥等四十二名此外男婦大小共四千二百餘名其本係良民並未習教被擄逼脅者亦在其內

臣

等卽宣布

恩旨凡平日誤習邪教聽從爲逆者一經投出均免治罪該犯等無不歡欣鼓舞共慶更生

臣

等隨

將擒獲首逆李登敖親自研鞫據供學習邪教  
及本年六月起事意欲接應胡正中等各情節  
查該犯倡首爲逆罪不容誅訊明之後傳集投  
出各犯令伊等看視將李登敖凌遲處死無不  
悚懼悅服之至<sub>臣</sub>等仍恐或有藏匿餘匪未經  
投首連日率同董寧川等帶領兵勇四出搜山  
直至賊人屯住之處及周圍四十餘里內外並

無餘匪藏匿實已傾巢而出相率歸誠至諸神

保何元卿等昨經<sub>臣</sub>等暫留來汛搜捕零匪茲

又搜殺二百餘名實已剿淨無遺業經撤兵前

來<sub>臣</sub>等現將投出之男婦四千餘人逐一安頓

務期妥協卽帶兵馳赴榔坪一帶剿捕賊匪

福寧觀成又奏言伏查匪徒學教爲逆情罪重大

本難寬貸茲因宋文錫等旣已悔罪投誠且人

數衆多若概子駢誅無以仰體

皇上好生之德而刻下榔坪鍾祥賊匪尙未殄平該

匪等聲息相通一聞投出之人復經嚴辦誠恐

堅其梗化之志是以<sub>臣</sub>等宣布

恩旨示以

朝廷寬大之仁俾令蠢頑聞風感格但宋文錫李登  
祥等四十二犯均係緊要頭目而此內張榮學

張榮相等二十犯又係土苗此等匪徒特因其  
自行投出可以貸其一死俾與始終抗拒者辦  
理有別然仍留本地若輩邪僻性成一時震懾  
兵威難保日久不復萌故智臣等現將宋文錫  
等及各家屬解赴施南郡城看管飭令時時駕  
馭防範俟湖北邪匪一律洗淨之後即將宋文  
錫等四十二犯發往黑龍江給索倫達呼爾爲

奴其家屬不論男婦大小發往烟瘴地方安置  
以示懲創而淨根株至其餘夥黨現已取具十  
家互結一人有犯九家同罪併飭令地方官妥  
爲安頓造冊存案時刻留心稽察如稍有不妥  
分之人卽行正法毋得稍事姑息其並未習教  
被擄逼脇之男婦等本係良民忽遭蹂躪家業  
蕩盡情狀堪憐臣等酌給銀兩口糧令其各安

本業但究已身陷賊巢仍行記檔約束以示區別  
同日成德文圖奏言查關口地方係通歸巴  
東湖要路乃賊匪出入咽喉况賊匪自三刀以  
來滋擾猖獗未經官兵剿捕肆無忌憚今雖連  
奪二卡賊情未必甘心當卽挑派朱士奉帶兵  
二百名緊守頭卡又派協領果勒明阿帶兵二  
百名緊守二卡加意嚴防嗣於初四日陰雨連

綿復傳令各卡官兵往備初六日黎明雨霧更大賊料我兵必不防備鎗礮難施遂乘雨冒霧潛至頭卡牆邊我兵鎗礮用繳遮護燃點火繩早經預備一見賊至朱士奉當於卡內鎗礮並發立斃賊匪數十人身先士卒登時跳出卡牆率兵奮勇衝擊二卡果勒明阿亦帶兵前來接應共殺斃賊匪二百餘人賊衆拚命抵拒

臣文

圖督率千總李文秀等帶兵直上關口迎擊

臣

成德督率佐領瑪克湯阿帶兵繞過山後抄出  
截殺賊匪首尾不能相顧又經朱士奉果勒明  
阿等帶兵從上壓下三路夾攻至午逼入山溝  
深坎殺斃賊匪三百餘人落岩墜澗死者不計  
其數餘匪由扁擔埡奔逃經黃連坪守卡之候  
補叅將諾音保日賊匪由山梁敗走卽同各處

守卡佐領額貝防禦泰興等帶兵追擊又殺斃  
賊匪一百餘人時值大雨山徑陡滑難以窮追  
當卽撤兵回營查行營外委郭喜周學義生擒  
賊目僧心海一名隨營武生吳萬清殺賊二名  
又滿兵喜祿武生孫榮植孫貴外委王登科等  
生擒賊匪潘學品等二十三名隨將僧心海研  
訊明確凌遲處死潘學品等一併梟示臣等本

擬乘勝進攻奈山徑叢雜道路崎嶇現兵僅存  
七百餘名而河南之張家口恐賊偷渡派去扎  
卡兵一百名河北之馬連溪係賊出路派去扎  
卡兵一百名其餘儘就賊之東北後路關口黃  
連坪青崗坪一帶擇其最要之處分布扎卡堵  
截設法進剿均奏人

上命軍機大臣傳諭畢沅福寧成德惠齡汪新曰福

寧等攻剿宜恩縣龍馬山賊匪餘黨全數投誠所  
辦可嘉現在宜恩一路旣經肅清而榔坪亟須兵  
力剿捕福寧現已馳赴該處務須奮勉督兵與成  
德等會合夾擊擒獲首逆林之華等剿淨餘匪迅  
速蒞事遊擊董寧川尤爲出力著加恩以叅將陞  
補福寧自宜恩前赴榔坪約幾日可到著卽將會  
兵剿賊情形迅速具奏至酌辦龍馬山投誠賊匪

亦祇可照所奏辦理但賊目等人數較多且甫經  
投出難保其不心懷反側著傳諭畢沅汪新嚴飭  
施南府隨時留心防範稽察勿令稍有疎虞再成  
德等痛剿關口撲卡賊匪殲斃多賊所辦亦屬可  
嘉所有守卡殺賊之副將銜朱士奉著加恩以副  
將卽補其餘帶兵守卡殺賊之將弁等均著以應  
陞之缺陞用武生吳萬清孫榮植孫貴卽著以千

總把總等官酌量拔補至成德處兵力較單尙覺  
不敷攻剿此時惠齡搜捕涼山餘匪自己完竣就  
近帶兵馳赴榔坪而福寧等又已由宜恩移兵會  
剿與成德惠齡分路夾擊賊匪自無從逃竄成德  
等務須上緊剿辦尅期蕝功同邀懋賞